

Santiago Icoinra Huafo Cunushoni

Santiago ato tsain shara yoini

1 ¹Uhuun yoramishtichin man manifoti pashcananni. Unquian Santiago un mato yoisharapai. Ascan un mato cunu fomai man tapinon. Upa Dios futan nocon Ifo Jesucriston un ato yonomatifin unquin.

Upa Diosin noco cayacafi shinanmasharatiro

²⁻³Uhuun yoramishtichin ahua ahuuscarafiaino man shinanchacatamarocon man Jesús icoinra huaquin finacoinshon funaquima man tunutiro. Man asca huaino Jesús mato imapaiyai cuscan man atiro. Ascan ahuafoan mato chaca huamapaifiaino unimacoincahuun. ⁴Man ascashu Jesús cuscara ahuan tanamisicoi shara man itiro. Ahua futsacai man yopaima isharashquin.

⁵Ratoran man futsan man ahuashta tapishoma Dios yocacahuun mato tapimanon. —Ua fucashni huayamacahuun, —ishoncai mato Upa Diosin yoinacama. Man tapipaiyai cuscan nantifi unimacainrocon mato tapimashquin. ⁶Ascan man Dios yocafiatan ointi rananya iyamacahuun. Shinanquin isca huayamacahuun, —Un Dios yoca cuscan ua tapimai iyamarai itsairaca ua tapimaimaran, —ishon anori shinanyamacahuun. Ascatama

icoinra huacoincahuun. Tsoan icoinra huacoinyamashu nan fuitan ihui focuatiro cuscan. Ascashu fuuhuanquin ihui focuacaiton non tapitiroma raquiricaimain focuaquicai. Nanscarifi aquin tsoan Dios yocafiaquin icoinra huacoinyamashon futsa futsa huaquin shinantiro. ⁷Man ascaiton, —Nocon Ifoan noco ahuarashta huashoinran —ishon shinanyamacahuun. ⁸Ascan, —Uncai tapiama Diosin ua ashoyamaraquinmain ua ashoicain, —ishon shinanyamacahuun. Ascarafocai Diosin ato ahuashta huashoshquima. Nanfoan ointi rananyashon futsa futsa huaquin shinanmisifo.

⁹Ascan atirifi Diospan yorafo nan ahuuomafohuunoa icoinra huamafoan shinantirofo isca huaquin, —Nan ahuuomafocai ahumaran, —ishon atohuunoa shinantirofofia nanfocafin Diospan facufoquin. Ascafia nan ahuuomafocai shinantirofo isca huaquin, —iAicho! Unfin Diospan facucoinquin. Un Jesús yafi Dios fu ipashquiran, —ishon shinantirofo. ¹⁰Nanscarifi ratoran Jesús icoinra hua futsan mafo ichapayashon shinantiro isca huaquin, —Uhuun mafocai ua imasharatiroma. Urifi un Jesús fasi yopacoin uhuun Ifo inon ua imasharanon. Jesús ua numayamaino urificai un ahuashta itiromaran, —ishon shinantiro. Charo samamashta tsasiashu niriqui futsutiro. Nanscarifiyai yora mafo ichapaya

samamashta natiro. ¹¹Farin fanafo tsacaino samamashta tsasitiro. Ascashu niriqiu futsutiro afanancai shara itiroma. Nanscarifiai nan mafo ichapaya ahuun mafo inanmitsapaifiai samamashta narisc'ai amaqui cachitiro.

Ahuara chaca non finonfiainton Diosin noco tapipai nonmain tanasharaqin

¹²Tsoan omitsiscafiaquin tunucoianfin nanfin unimacoin itiroquin. Ascacun Upa Diosin ahuunoa yoiyoni isca huaquin, —iAicho! Mian nicasharafain niyoshon mian noimisi. Ascashufin natian min ufu ipatiroquin, —ishon yoini. ¹³Tsoancai yoitiro ma isca huaquin, —Un chaca huapayai cuscan Upa Diosin afin ua chaca huamapairan, —ishocai yoitiro ma. Tsoanshtaricai Dios chaca huamatiroma. Arificai tsoa chaca huamapacunacama.

¹⁴Ascatarocon ratoranfoan chaca huapayai cuscan atohuun nua. Afin ahuun nomuranshon chaca huapayai cuscan nanscacoïn huatiroquin. ¹⁵Un mato ahuara futsa yoi. Tau huaquin nocofunun ainfo facu nanumana. Funainquimashta ahuan shaqui murannoashu yosiacutiro. Caiyaintian facu caintiro. Nanscarifi aquin tau huaquin nocon nomuranshon non ahuara chaca shinanfafaitiro. Ascashon chipo non chaca huatiroquin. Ascatan chaca huariaicai non Dios fu rafutiroma. Nocon chacahuunoashu amaqui non ipanaca.

¹⁶Ascacun uhuun yoramishtichin mafiri paramuyamacahuun. ¹⁷Nocon Upa Diosin nai muran ifiashon nuno mai ano noco shara huashofafaini. Nantofin nantifi noco oni huashosharaniquin. Fari non oshu non fishifo non nantifi chashafoti Upa Diosin onihuani. Ahuara shara futsaforifi nantifi noco onihuashoni.

Noco shara fustisi onihuashoni. Nanscarifiai fari tsacaino nocon yoshin samamashta fiananantiro. Asca Diosincai fianananpacunacama. Ascataricain ointi rananya ipanacama. Nanscasipacunaca. ¹⁸Upa Diosin noco catonni ahuun tsain iconcoihuunshon noco cainma futsa a cuscara shara non inon. Nonfin Jesús icoinra huaquin tau huaniquin. Ascashu Diosin nantifi onihuani fothi huunoashu non ahuun facu iyoa cuscara.

Diosin tsainfin cayacaficoïnquin nicashu nanscacoïncahuun

¹⁹Uhuun yoramishtichin un mato yoiai cuscan nicasharacahuun. Futsan mato ahuara yoiaiton funaquima nicasharayocahuun. Tsain ichapa yoimisi iyamacahuun. Samamashta sinayamacahuun. ²⁰Upa Diosin Furun cuscara shara noco imapaiaino non sinaitocai noco imapayai cuscan noco imatiroma. ²¹Ascacun ahuara chaca maton nomuran man shinanmisi cuscan huafain ahuara man chaca huamisifori shatucahuun. Ascatan Diospan tsain mato nomuran man nanushon. Mato yoini cuscan nicasharacoincahuun. Man Diosin tsain nicasharashufin man afu ipasharatiro.

²²Diospan tsain nica fustiquima. Nan cununi cuscacoïn acahuun. Man nicafiai ascayamashufin man mafiri paramuiquin. ²³⁻²⁴Futsan ahuun fuso fuisitinin oinfiashu samamashta oian cuscan ointiaquimai. Nanscarafiai man Diosin tsain oinfiashu nan oian cuscacoïn aima. Ato yononi cuscan man tapifiashuc'ai ascacoïanfoma. ²⁵Futsafocai ascarama. Diosin tsain shara fustisi oinsharashu nan yoia cuscacoïaino. Shafatifi Diosin tsain tanacoïancai ahua futsa afanan ahuun ifo itiroma. Ascashu ishara fusticoïancai ahuun ointi unimatiro.

²⁶Ascan tsoan yoiquin isca huai,
—Unfi Diosin tsain nicacoinmisiquin,
—ishon anori yoifiaqui tsain chaca
yoiquin shatuamashu nanscara yorafin
afiri paramutiro. ²⁷Ascacia nan facu
uhuamacoinfo yafi ainfo funuomafo
non cushusharacai. Nan icoinra
huamafoan acaifo cuscan non huaima
non ascaino Upa Dios nocoqui unimai.

**Nantifi yorafohuunoa nannorifosi
shinansharacahuun**

2 ¹Uhuun yoramishtichin nocon Ifo
Jesucriston Upa Diosin cuscaracoin.
Nanfin man icoinra huamisiquin.
Ascacun yorafohuun nannorifosi
shinansharacahuun. Nan man futsafori
shara huamisi cuscan huafainri
futsafohuun shinanchacayamacahuun.
Shara huacahuun. ²Itsairaca nocofunu
mafo ichapaya matofu ichanainno anio
chashna shara sahuufain sahuuti
sharacapacoin sahuufain matofu
ichanantiro. Ascan nantiantari nocofunu
ahuuoma sahuuti chocashta sahuuashu
arifi matofu ichanantiro. ³Ascaiton nan
nocofunu mafo ichapaya samamashta
man yoitiro isca huaquin, —Uhuun
yorashtan, nuno tsaoti shara ichananti
pushu muran tsaoyohuun, —ishon man
yoiaino nantianri ahuuomashta
nocotiro. Ascashon man yoiquin isca
huai, —Min cachiori nitiroran
huayamaraquin tapa camaqui tsoahuu,
—ishon man yoiquin chaca huai. ⁴Man
asca huaquicai yorafohuun nannorisi
man shinainma. Ascaquin man chaca
shinain. Nan yora mafo ichapaya man
shara huafiaquicai yora ahuuomashta
man chaca huamisi. Ascaicai mafi ranan
man nannorifosi shinanonainma.

⁵Ascacun uhuun yoramishtichin ua
nicasharacapun. Un matohuun
noicoishon un mato cayacafi
shinanmasharapai. Yora

ahuuomafohuunoa nan icoinra
huamafoan shinanmisifo isca huaquin,
—Nan ahuuomafocai ahuamaran,
—ishon shinancani. Upa Diosincai
atohuunoa anori shinainma. Nanfin
yora ahuuomafo catoan Jesús icoinra
huacoinonfo. Ascacun nan
ahuuomafoan Upa Diosin noicoiainfoan
ato yoiyoni cuscan nantifi ahuunafori
atona iishquin. ⁶Nannori Diosin yoifiano
mancai ahuuomamishtifo sharacoin
huamisima. Shinanapon. Nan
ahuuomafoan mato chaca
huamaforocon nan mafo ichapayafoan
mato paramisifo. Ascashon mato
curushcain ranushumufoan aton
niaifocoin ano iyomisi. ⁷Nanfoanrifi
nocon Ifo Jesusqui tsain chaca
huamisi foquin.

⁸Ascan nocon Niaifoan Diospan noco
yononi cuscan man ashufin man
cayacafi isharatiroquin. Noco yononi
isca huaquin, —Mafiri man noimuai
cuscan huafain futsafohuunri
noicoincahuun, —ishon Diospan noco
yononi. ⁹Ascacia man asca
huatamarocon nan mafo ichapayafofi
man shara huamisi cuscaicai nan
ahuuomafo man shara huamisima. Man
ascaicain Diosin yononi cuscan man
aima. Ascaquifin man chaca huai.

¹⁰Ascashon mancai shinanquin isca
huatiroma, —Diosin noco yononi
cuscan atirifi un nicacointiro. Asca
fustishtacai un tanapaimaran, —ishon
anori man shinainno yoitimacoin man
itiro. Ascashu nantifi Diosin yononi
cuscan man nicacasmai cafiscatiro.

¹¹Upa Diosin yononi cuscan,
—Nocofunufocoin aton ahuinma fu
iyamaifoanno ainfori nanscarifi aton
funumafo fu itiromaran, —ishon
yonofain Diosin yonoquirifi isca huani,
—Tsoa rutuyamacahuun, —ishon noco
yononi. ¿Ascashon maton ahuinma

iyamaraiyainforifi maton funuma fu iyamafiachashon man futsa rutua nanmun shara? Ma. Man futsa rutuacai Diosin noco yononi cuscan man aima. Ascashu man yoitima itiro.

¹²Diosin noco yononi cuscan noco imasharapai afanan ahua chaca noco Ifo itama non afu isharacoincacainon. Non chipo Diosiqui nocoaiton noco yoishquin nonmain nicasharamisi iyamarai nonmain nicascasmamisiquin. Nannori noco yoishquin. Ascacun oinfain. Shinansharafain isharacoincahuun. ¹³Ascashon Diosin nantifi yorafo puashoshquin. Ascan niyoshon man futsafohuun ramapaipaonimacun Diosiri matohuunri ramapaishquima. Ascan niyoshon man futsafohuun ramapaipaonicun Upa Diosin matohuunri ramapaishquin. Ascashocai mato onaintimaima. Ascata ma manrocon afu ipasharatiro.

Tsain fustisi yoicaquima nan man yoimisi cuscacoin acahuun

¹⁴Uhuun yoramishtichin un mato yoisharapai. Man futsafo yoiquin isca huamisi, —Un Jesús icoinra huairan, —ishon yoifiashocai futsafo man shara huamisisa ipaitsicoin man yoimisi. Un Jesús icoinra huairan ishon yoifiashu maton nomuracai fiananancoianma. ¿Nanscarafu Dios fu ipatiromun?

¹⁵⁻¹⁶Natian iscara un mato tapimapai man tapisharanon. Itsairaca mato yorahua sahuutiro macun tushuomacuri oinquin man yoitiro isca huaquin, —iAicho! Uhuun yorashtan Diosin mia shara huaiquin. Sahuuti shara sahuuhuu matsinashquima. Ascata pisharahuun. Un chipo mia shafa futsan oinshquinon. Casharatahuun, —ishon yoifiacai yopai cuscan man inanyamaino nancai ahua. Mancai ashosharama.

¹⁷Nanscarifi aqui man yoiquin isca huai,

—Un Jesús icoinra huairan, —ishon yoifiatan man futsa shara huayamaino acai ahua. ¿Tsoanco mato icoinra huatiromun a man Jesús icoinra huacun?

¹⁸Itsai raca futsan yoitiro isca huaquin, —Min Jesús icoinra huai min ahua futsa yopaima Upa Dios fu ipashquin, —ishon yoitiro raca. Ascfia man futsafo shara huayamacun tsoancai tapitiro ma Jesús icoinra huai. Unfin Upa Dios yonoshona cuscan nantiffain man ointiro un Jesús icoinra huacoinmainquin. ¹⁹Nan Dios fustifin man icoinra huamisisiquin. Nanfin sharaquin. Ascan yoshin chacafoanri man tapiafo Dios fusticoin. Ascashu fasi aqui ratucoinca tari taricani.

²⁰Man ratoran futsan icoinra huafiashon Diosin yononi cuscan man ayamashucaí mancai ahua. Ascan Diosin yononi cuscan man ayamashucaí man icoinra huacoinma. Tatimafafainyamacahuun.

²¹Shinacapon. Upa Diosin nocon shuni Abraham yononi cuscacoin ani. Ascashon nicasharacoincun Diosin yoini, —iAicho! Un mia yoia cuscan min aa. Min fasi shararan, —ishon yoini. Diosin yononi cuscan Abraham ahuan furun Isaac rutucuan Dios inanshquin. ²²Abrahamfin Dios icoinra huafain yoia cuscan aniquin. Diosin yoini cuscan huacoinshon non tapitiro a icoinra huacoinshon. ²³Icainra huacoincun Upa Diosin ahuan yoini, —Abraham minfin sharacoinquin. Ascashu min ufu isharatiro, —ishon yoini. Diosin Abraham yoiniri, —Abraham minfin ufu rafusharacoinmisisiquin, —ishon Diosin yoini.

²⁴Ascashon man tapitiro non icoinra huai fustihuunoashucaí non Dios fu ipatiroma. Non icoinra huacoinfain

noco yoia cuscan acoinnashu non afu ipatiro.

²⁵Nanscarifiai nan ainfon furoma ahuun anu Rahab. Nan Israeli rafu Rahab ahuun caifoa pushurasi muran noconifo ahuu cuscaramainquin tapipaicani. Ascashu chipo Rahab ahuun pushu murancoin iquinifo. Ascacun nanton ahuun pushu muran nocon caifo rafu onuni ato ahuusca huanonfoma. Ahuun pushu muranшон ato fai futsan nichini ahuun caifo futsafoan ato fuchinonfoma. Upa Diosin Rahabhunoari yoini, —Min ua icoinra huashon nan rafu min shara huaa. Ascacun un mia imashairan, —ishon Upa Diosin Rahab yoini. ²⁶Afanan un mato iscara tapimasharanon. Nocon furo yoshin nomaqui caanofin nocon caya natiroquin. Afanancai shara itiroma. Nanscarifi aquin non Diosin icoinra huafiashton noco yononi cuscan non futsafo shara huayamainocai nancai ahuama. Non ascaicai non shara itiroma.

Nocon tsainhuunooa cununi cuscan

3 ¹⁻²Uhuun yoramishtichin un mato ahuara futsa yoinon. Maton muranfin tapimamisi fustirasi itiro. Nantifinton man non ahuara amaquri chaca huafafainmisi. Ascafia Diospan tsain tapimamisifoan amaquri yosicun Upa Diosin ato onaintimaquin finacoinsquin. Ascan nan ahuara chaca yoimisima nancainfi isharacoinsquin. Ascashu shara fustisi itiroquin.

³Un mato afanan ahuara futsan tapimapai. Nan caballo ahuun cunopan anushushon fichiqui rusfi chichishon cayacafi casharai canon non ninifoanfaitiro. Caballo uhuapacoinfiacun nan ahuun anushumutinin

uhupamashtacoinfiashon nan non niniaiquiri catiro.

⁴Shinacapon. Shashohuan uhuapafiacun ahuun chifishtati uhuapamashtafiashton nan non iyopaiyaiquiri iyotiro. Fuuhuanun shashohuan catima huafiatiro ahuun chifishtatinin nan non iyopaiyaiquiri iyotiro. ⁵Nanscarifiai nocon ana uhuapamafiashton nocon tsainmanri non futsafo fasi chaca huatiro. Nofiri non chaca huamutiro. Ascan parito ushu uhuapamashtacoinfiano mau uhuapacoin cotiro. ⁶Nanscarifiai nocon ana uhuapamashtacoinfia chi cuscara. Nocon tsainhuunooashu nofiri non chaca huamucointiroma. Nocon tsainhuunshon non nantifi chacana huatiro. Yoshin chacahuunshon non ahuara chaca yoitiro futsafori omitsiscamashquin.

⁷⁻⁸Asca yoina futsa futsatapafo yafi puiyafu non mupash cuscara non unu muran icafori non onaonma huatiro. Ascafia noco anancai tsoanshta non onaonma huatiroma. Ascashon nocon tsainman non chaca futsa futsatapafo yoitiro. Nocon tsainfin nan rono pau cuscaraquin. Nocon tsain chacahuunshon non futsafo namatiro.

⁹⁻¹⁰Nanhuunri nocon Ifo Upa Diosihuunooa non tsain shara yoitiro. Nantofin yorafo onihuaniquin a cuscara inonfo. Ascafia nan noco anari non futsafo tsain chaca yoimisi. Nanhuunri non tsain shara yoitiro. Ascacun uhuun yoramishtichin ascaramafinquin.

¹¹¿Unu rufoquinoashu tsoi afainocai unu saoya ositiromun? Ma. Ascaracai itiroma. ¹²¿Uhuun yoramishtichin non manian fanamun shopa foaitiro? Ma. Ascaracai foaitiroma. Non ahuara fanafin nanscaracoin foaitiroquin. Nanscarifiai unu rufoquinoashu

afainocai sao ya afatiroma. Ascatari tsain shara yafi chaca ositiroma.

Diosin noco iconcoïn shinanmatiro

¹³Tsain futsari un mato yoinon. Nan mafi ranan man cayacafi shinanmumisi cuscan. Futsafori man ashosharamisi. Ascashon man ato ismasharatiro. Tsoa chaca huamisima nan Diosin yonoaiyai cuscan fustisi huamisi. Man ascaiton nantififain ointirofo man Dioshuunshon cayacafi shinansharacun. ¹⁴Ascan man isharatamarocon maton nomuran fucashcoïn icain futsa aya cuscan fipaifain man shinanchacafain mafi man apaiyai cuscan fustisi futsafo yonoquin. Anori shinanquin isca huayamacahuun. —Un Diosin tsain tapicoian. Un ahuun ointi cuscaracoïnran, —iyamacahuun. Anori yoiquifin man futsafo paraincain maton nomuran man chaca shinain cuscan fusti huafain man ato fomanpai. Ascashufin man cacapaimisicoïnfoquin.

¹⁵Anoricai Upa Diosin mato tapimamisima. Jesús icoinra huamafoan shinanchacamisifo. Man ascashon Satanás yoshin chacapan mato amaquiri shinanchacamamisi. ¹⁶Isca huaquin mato shinanmatiro. Futsa aya cuscan fipaifain futsaqui shinanchacafain mafi apaiyai cuscan fustisi shinanfain futsafo matohuunoa man shinanmapai ato yonoshquin. Ascashufi man cacapaimisifoquin. Man ascaifin fasi man fochishmanantanantiroquin. Ascaquin man ato fucash huatiro chaca futsa futsatapafo huacicaï tsoan cayacafi shinantiroma.

¹⁷Ascan Upa Diosin cayacafi shara shinanmisi cuscan matori shinanmapai isca huaquin. Maton nomuran shinanshara fustifain futsafo fu shara huatanancain fochishmanantanapaitama futsafo shara huashofain futsafoan mato yoia

cuscan nicasharafain futsafo shutiacufoanpayamafain futsafohuun ramapaiquin ato shara huashofafainmisi icain, nantifiton nannorisi shinansharafain ointi rananya iyamacain fomanpaimisiri itamarocon cayacafi fustisi yoimisi. ¹⁸Ascashon nannorifosi man shinainno futsafori man shinanmasharatiro isharacoïnnonfo Jesús cuscara shara ishcaquin.

Icoïnra huamafoan apaiyai fo cuscan noiyamacahuun

4 ¹¿Ahuuscain mafi ranan man fochishmanantanantiashu man sutunainmun? Maton nomuran shinanchacashufin man ascaicain. Chaca fusti fuchipai. ²Man ahuafo fuchipaifiaquicai man fitiroma. Ascashon fasi fuchipaiquin man futsa rutupaitiro fianpaiquin. Ascashu man fochishmanantanain tsain isininpaton man iquinonain. Ahuafo fipaïquin man fipaïyai cuscacai man Dios yocamisima mato inanon. ³Ascashon Dios cufiffiaquin man amaquiri yocaitocai. Asca Diosin mato ahua inantiroma. Mafi man apaiyai cuscan fustisi amupaimisi. Man ascaitocai mato ahua inantiroma.

⁴Afin mato amapaiyai cuscacai nancaïrocon shinantama nan mafi ranan man apaiyai cuscan fustisi man shinanmisiquin. Ascaquicai man Dios noicoianma. ¿Man tapiamamun nan icoinra huamafoan fuchipaïyai fo cuscan marifi man fuchipaya. Ascaqui man Dios noicasmamisi itiro? Asca man icoinra huamafo cuscara icashufin Diosin noicasmamisi man itiroquin. ⁵Diospan tsain cununi isca huaquin, —Uhuun Yoshin Shara un mato ya rafumaniran, —ishon cununi. ¿Man shinanmun ipaitsi noco cunushoni? Man ahua futsafo noiaïton oïnquin ahuun

Yoshin Shara fasi ahuun ointi isincointiro. ⁶Ascán afanan Diospan tsain noco cunushoni isca huaquin, “Ratoran futsan Upa Dios nicacasmai afin apaiyai cuscan fustisi huai nanfin cacapaimisicoinquin. Ascaraquicai Diosin unimaima. Ascashon ato onaintimashqui. Ascafia nan ratoran futsan Jesús cuscara ipaicoinquifin nantonfin tapiaquin fasi Jesús yopacoin isharashquin. Nanscarafohuunfin Diosin ramapaiquin ato shara huashoshquin finacoinshquin ahuun curushu ato inanshquin tanasharanonfo,”

ishon cununi.

⁷Ascacun Upa Diosin mato yoimisi cuscacoin acahuun. Nan yoshin chaca Satanás mato amapaiyai cuscan nicayamacahuun. Ascashon yoiquin isca huacahuun, —Satanás, Jesucristo uhuun Ifoquin. Umaquinoashu catahuun, —ishon yoicahuun man asca huaino matomaquinoashu ichoriscatanon.

⁸Ascatare Dios fu rafucahuun a cuffifafaincahuun. Man ascaino matofu rafucacaitiro. Man chaca huamisi cuscan shatucahuun. Ascashu afanan ointi rananya iyamacahuun. Man Dios tanafashon nantianricai nan icoinra huamafoan acai cuscan man huatiroma. Ascaquicai man tanasharatiroma. Ascashon maton nomuran man shinanchacamisi cuscan shatucocincahuun.

⁹Man chaca huamisi cuscan shinancasmacahuun. Ascashon man chaca huamisi cuscan shinantani uaicahuun. Afanan afo shinancani shuchitamarocon uaicahuun.

¹⁰Ascashon nocon Ifo Jesús yoiquin isca huacahuun, —Ifon un fasi mia chaca huamisi. Ascacun ua numahuu, —ishon

yoicahuun. Man ascaiton Upa Diosin matohuun ramapaiquin maton chaca soashotiro man afu ipanon.

Futsahuunoa yoiqui chaca huayamacahuun

¹¹Uhuun yoramishtichin Diospan tsain noco yoiquin isca huani, —Noinancatan yoiti huatananyamacahuun, —ishon cununi. Man ascayamacai Diosin noco yononi cuscan man aima. Ascaquifin, —Diospan tsain amaquiriran, —ishon man yoicai. Ascashon mancai yoitiroma, —Diospan tsain cayacafi iyamarai amaquiriran, —ishon yoitamarocon ahuun tsain man nicacointiro. ¹²Diosin fustiton noco yonopaiyai cuscan noco cunushoni. Arus fustifi tapicoianquin tsoamain isharacoian iyamarai chaca huaquin. Nanton arus fusti tapia noco numa iyamaraimain noco omitsiscapanacafo muran potaicai. ¿Ascán ahuuscain man futsafohuunoa yoiqui chaca huamisimun?

Ahuara ahuuscara afaitocai non tapitiroma

¹³Natian un mato tsain futsa yoiaton ua nicasharacahuun. Atirififain man yoimisi isca huaquin, —Na shafata iyamarai funamanri non pushurasi futsa ari canon. Nannoshon non fari fusti finonyoicanon ahuara inanmitsashon ahuun rafanan non pui ichapa finon, —ishon man yoimisi. ¹⁴Ascafiahocai man tapiama funamanrimain ahuuscataniquin. Nishon man cainitian yafi man naitian nishfo cuscara. Man oinfaiño samamashta yamafoaintiro. Nanscarifiai mancai chai nipatiroma.

¹⁵Ascacun anori shinantamarocon man shinanquin isca huatiro, —Upa Diosin ua nimapaiyaino un niyotiro. Nantonfin ahuara apaiyai cuscan ua huamatiroquin, —ishon man yoitiro.

¹⁶Ascafia mancai ascara shinanmisima. Ascatarocon man yoiquin isca huamisi, —Ufin un apaiyai cuscan un huatirocon, —ishon man shinamisi. Ascashu man cacapaimisi. Man ascafin fasi chacacoinquin. ¹⁷Ascashon ratoran futsan Diosin amapaiyai cuscan tapiflashon futsa ashosharayamaino nantofin chaca huaiquin.

**Mafo ichapayafo Santiago ato yoini
ascanonfoma**

5 ¹Mafo ichapayafoan ua nicasharacahuun un mato cayacafi yoinon. Ascan natian man ahuashta yopayamafiai chipo man fasi omitsiscashquin uaiquin. ²Man ichapa aya cuscan chipo payocoi futsui. Maton sahuuti sharacapaconinfo coroisifoan piquin futsashcani. ³Maton puiiri afanan ahuushta ahuun nuima. Man maton pui ichapacoin mucua oinquin futsan yoitiro, —Mifin min yoashicoin. Mina futsafohuun ramapaimisima. Ascacun Diosin mato onaintimashqui. Maton ointi ihuucuin mui. Man ahuuscampaishquin. Man fasi ratucoin nan tapiashu chipo man omitsiscashquiran, —ishon ato yoi. Nanfin ahuun unutaniquin.

⁴Shinancapon. Mancai maton yonomamisifo inansharamisima. Man ato fuparamisi finonmafain fiifiaquin. Upa Diosin ahuamamishti atiroquin. Man ato chaca huamisi cuscan nanton oian. Fasi yonoi atsanacani piniaifoan Diosin man ato nica.

⁵Mato yonomisifo omitsisca cuscan mancai ascatarocon man nioyashu man fasi isharamisi. Ahuashtacai man yopamisima. Moipan ichapa pii shoatiro. Tapiama shoacun ifoan rututiro pinonfo. Nanscarifiai mancai nioyashu isharamisi. Unimacain ahuara

apaiyai fustisi man amisi. Man tapiama ascara chaca huafiashu samamashta man nai omitsiscacai futsushquin. ⁶Yora tatimamishtificun man ato chaca huamisi. Atohuunoa tsain chaca man huai niaifo ato achimashquin. Man ato chaca huaino ahuuscashucafi afinri numatirofoma. Ahua chaca huayamafiashu nan maton tsainhuunshon man ato rutumani.

**Omitsiscafiaquin tunufain Dios
cuficahuun**

⁷Uhuun yoramishtichin man omitsiscafiaquin tunuyocahuun nan nocon Ifo Jesús oaitian. Funayamacahuun. Natian un mato ahuara futsa yoipai. Mau fanashon ifoan funainquimashta manasharatiro nan funusharaitian. Oi pacutian manasharatiro funushonaitian. ⁸Nanscarifi aquin manayocahuun. Nocon Ifo man oti chaimaquin. Ascacun ahuun tsain cachiquire huacaquima tanasharacahuun.

⁹Uhuun yoramishtichin nocon Ifo man oti chaimaquin. Tapicahuun nan chacafo onaintimayoi oiquin. Ascacun futsaqui tsain chipuyamacahuun matori onaintimanonma. ¹⁰Nocon shunifoan nan nocon Ifo ahuun tsain yoimisifoan fasi omitsiscafiaquin funatama nocon Ifohuunoa ato yoipaonifo. Nan ipaonifo cuscan atohuun caocahuun. ¹¹Man man tapia nanfoan omitsiscafiaquin funatama tunuocoinpaonifo. Nanscarafofin unimatirofoquin ishon non yomisi. Nocon shuni Jobhuunoa man man nicamisi. Fasi omitsiscafiaquin nocon Ifo icoinra huacoinni. Ahuun tsaincachiquire huanima. Ahuun unutaqui Upa Diosin fasi shara huashoni nan funoni cuscan afanan inancoinni. Ascan non tapitiro nocon Ifoan nocohuun ramapaicain nocohuun noicoi.

¹²Ascan man man tapia Upa Diosin nocohuun noiquin noco cushusharamisi. Ascan Diosin noco shinanmafafaini nan man tapicoian cuscan futsafo ismacahuun. Maton tsainhuunshon ato ismacahuun. Man futsafo matohuunoa icoindra huamapaiqui isca huaquin yoiyamacahuun, —Diosin ua oiainno un mato icon yoiran, —ishon yoiyamacahuun. Mato tsain, —Ai iyamarai ma, —ishon yoicahuun. Icon fustisi yoicahuun. Man ascaiton maton tsainhuunshon man chaca huatiroma Diosin mato onaintimanonma. Ascara shinancahuun.

¹³Asca man ratoran futsan chaca finonshon Upa Dios cuficahuun. Man ratoran futsan unimaquin Dios fanainshotiro isca huaquin, —iAicho! Upan Diosin min shararan, —ishon fanainshocahuun. ¹⁴Nan ratoran futsa isinincaiton nan ichananmisifo aton cushumisifo cunacahuun a cufishononfo. Nocon Ifo cufishquin ichapamashta shuniyashon fumanfain nocon Ifo Jesús anuhuunshon Upa Dios cufishocahuun. ¹⁵Man icoindra huacoinshon isinincaifo man cufishonaino cayasharatiro muma shara itiro. Nanton chaca huamiscun Upa Diosin a caya huafain ahuun chaca soashotiro. ¹⁶Ascacun man chaca huac cuscan yoinonancahuun Upa Diosin maton chaca soashonon mato caya huanon. Ratoran futsan Jesushuunoashu

isharashon nanton mato Upa Dios cufishonaiton nicasharashquin nan cufiai cuscan ahuamamishti huashotiro.

¹⁷Ascan nocon shuni Elfas nan nocofunu noco cuscarari ipaoni. Non muai cuscarari arifi mupaoni. Ascafiashon Upa Dios fasi cuficoiainno fari rafu non fusti nushmancayan oi fuyonima. Cufinquin isca huani, —Upa Diosin uhuun yorafoan mia cachiquiri huafoquin. Ascacun oi fumariamahuu uhuun yorafoan afanan mia tanasharanonfo, —ishon cufini. Asca huano fari rafu non fusti nushmancayan oi fuyonima. ¹⁸Ascan chipo afanan cufiaino oihuanrasi funi. Nantianri yonofa foaisharani.

¹⁹⁻²⁰Uhuun yoramishtichin mafin ranan Diosin tsain tanacashon futsan Diosin tsain cachiquiri huacun afanan Jesús tanayamaiton futsan yoiquin, —Min chaca huamisi cuscan shatuhuu Jesús afanan tanasharahuu, —ishon anori man yoiaino nicashon ahuun chacafo shatucoianshu Jesusqui afanan nasotiro. Omitsiscapanacafo muran cacuana futsan numayamaino. Asca huashon ahuun chacafo cachiquiri huamacoinshon Diosin ahuun chaca rau huashotiro futsan numacun. Ascacun afanan Diosincai ahuun chaca ahuunoa shinainma manmain ahuun chaca shatumacoinshonfin. Nanti.

Santiago